



Broj: 01-GV-02-828-1.1/18
Datum, 25.07.2018. godine

Shodno odredbama člana 26. stav 1. tačka 2. Statuta Grada Sarajeva („Službene novine Kantona Sarajevo“, broj 34/08) i člana 148. Poslovnika Gradskog vijeća Grada Sarajeva („Službene novine Kantona Sarajevo“, broj 28/09), na 18. sjednici Gradskog vijeća Grada Sarajeva, održanoj 25.07.2018. godine, **gradski vijećnik Igor Gavrić, predsjedavajući Gradskog vijeća** uputio je **inicijativu** kako slijedi.

JP Televizija Kantona Sarajevo, d.o.o. se obratila Gradskom vijeću Grada Sarajeva molbom za finansijsku pomoć pri realizaciji dokumentarnog filma „Keli“, filma o Želimiru Vidoviću Keliju, koji se spominje kao jedna od najvećih legendi, kako u sportskom, tako i u ljudskom smislu, koje su grad i FK „Sarajevo“ ikada imali. Poginuo je u humanoj misiji, prevozeći ranjenike iz sarajevskog naselja Dobrinja prema bolnici Koševo 1992. godine.

Molba je u prilogu ove inicijative.

Upućuje se inicijativa Gradonačelniku da razmotri molbu JP Televizija Kantona Sarajevo, d.o.o. s ciljem određivanja o mogućoj finansijskoj podršci Grada Sarajeva projektu snimanja dokumentarnog filma „Keli“, putem pokroviteljstva Grada Sarajeva ili na drugi način, u visini od 5.000,00KM.

Pozivam gradske vijećnike da razmotre inicijativu i daju joj podršku kako bi postala inicijativom Gradskog vijeća.

Obrazloženje

Dokumentarni film autora Muhameda Bikića, novinara i publiciste, čije snimanje priprema JP TVSA, ispričat će priču o životu Želimira Vidovića Kelija, legendarnog nogometnika Sarajeva i reprezentativca bivše Jugoslavije koji je ubijen 1992. godine u humanoj misiji spašavanja ranjenika iz naselja Dobrinja. Životna pirča Kelija će biti ispričana prema kazivanjima njegovih najbližih, prijatelja, suigrača i sugrađana suvremenika, a vezano za ljude, događaje i mesta koji su zajedno s njim, obilježili Sarajevo.

Udruženje „Bordo prijatelji 1946“ je o Želimiru Vidoviću Keliju napisalo:

„Želimir Vidović Keli je fudbalska i ludska legenda grada Sarajeva.

Roden je 17.11.1953. godine u Sarajevu, gdje je u plemenitoj misiji i izgubio život 17.5.1992. godine, za vrijeme posljednjeg rata.

Svoju nogometnu karijeru je započeo u sarajevskoj Bosni, a za prvi tim FK „Sarajevo“ debitirao je 14.8.1974. godine. U devet sezona je branio boje kluba 241 put. Želimir Vidović Keli je svojim maestralnim igrama u dresu Fudbalskog kluba „Sarajevo“ zasluzio poziv i u državni tim Jugoslavije.

U bordo dresu je odigrao i svojim virtuoznim nogometnim umijećem, rješavao neke od najvećih utakmica koje ovaj grad uopće pamti, poput gradskog derbija u martu 1982. godine pred 55.000 gledalaca, što je nikad ponovljen rekord grada Sarajeva; utakmice kupa UEFA, te nesretno izgubljeno finale kupa Maršala Tita.

Svoju profesionalnu fudbalsku karijeru Vidović je zaključio igrajući za austrijski GAK, a potom se vratio u voljeni rodni grad. Po okončanju profesionalne igračke karijere radi kao trener u FK „Novi Grad“, sadašnja FK „Dobrinja.“

Želimir Vidović Keli kao fudbaler ostaće upamćen po svojoj bezgraničnoj plemenitosti, rijetkom i čudnovatom spoju elegancije i požrtvovanosti na terenu.

A kako je "igrao lopte" Keli je upravo tako i živio, nesobično dajući sebe za svoj grad i sugrađane. U najtežim trenucima po grad Sarajevo, u proljeće 1992. godine, Keli je bio i ostao tamo gdje je cijeli život pripadao. Opsada Sarajeva zatekla ga je na Dobrinji. Kao istinska sportska i ljudska gromada 17.5.1992. godine Keli je vozilom Hitne pomoći između neprijateljskih punktova, u misiji spašavanja života, prebacio u grad četiri najteža dobrinjska ranjenika. Na povratku u Dobrinju, gdje je žurio kako bi nastavio spašavati živote svojih sugrađana, kola Hitna pomoći kojima je upravljaо, zaustavljena su na neprijateljskom punktu, a velikom čovjeku Želimiru Vidoviću Keliju gubi se svaki trag.

Potraga za njegovim tijelom trajala je punih 12 godina. Petog juna 2004. godine na gradskom groblju Bare, pokopani su posmrtni ostaci legendarnog fudbalera i čovjeka Želimira Vidovića Kelija. Prema izričitoj želji porodice, Keli je pokopan u dresu FK Sarajevo, kluba i grada za kojeg je živio i stradao.

Danas jedna ulica u Sarajevu na Dobrinji, nosi njegovo ime, kao i teren u trening kampu FK "Sarajevo" na Butmiru, a svake godine se organizira fudbalski turnir u čast Želimira Vidovića Kelija.

Ono što Sarajevo, mali grad po svim statističkim kriterijima na evropskoj mapi prijestolnica, čini velikim i prepoznatljivim su upravo ljudi poput Želimira Vidovića Kelija koji daju taj jedinstveni pečat, sarajevski duh, po kome Sarajevo nadmašuje svoju objektivnu veličinu i naš grad čini jedinstvenim i posebnim.

Zbog takvih ljudi se ovaj grad i voli.

Grad Sarajevo i njegovi građani ostaće vječni dužnici Želimiru Vidoviću Keliju", poručili su Bordo prijatelji.

Gradsko vijeće je podržalo inicijativu, te je ona postala inicijativom Gradskog vijeća Grada Sarajeva.

PREDSJEDAVAJUĆI GRADSKOG VIJEĆA

Dr. Igor Gavrić, s.r.

Dostaviti:

- Gradonačelniku,
- evidenciji,
- a/a

J.P. TELEVIZIJA KANTONA SARAJEVO D.O.O.
TELEVISION OF CANTON SARAJEVO

Bulevar Meša Selimovića 12 - 71000 Sarajevo - Bosna i Hercegovina

www.tvs.ba, FAX 033 776796

UniCredit Bank d.d. Sarajevo: 3386902215316670 - ID No: 4200556770003 - PDV No: 200556770003



N / r Igor Gavrić, predsjedavajući Gradskog vijeća

Sarajevo, 10.7.2018. godine

Br. odl. 1149/18

Bosna i Hercegovina-Federacija Bosne i Hercegovine
Kanton Sarajevo - GRADSKO VJEĆE
GRADSKO VJEĆE

PRIMLJENO:	11-07-2018
Org. jed.	
Broj	

CT-GV-M-828/18 2P

Predmet: Molba za finansijsku pomoć pri realizaciji dokumentarnog filma " Keli "

U produkciji Televizije Sarajevo planirano je snimanje filma „ Keli“, autora mr.sc. Muhameda Bikića, novinara i publiciste.

Film govori o životu Željimira Vidovića Kelija, legendarnog fudbalera Sarajeva i reprezentativca ex Jugoslavije, koji je ubijen 19. maja 1992. godine pri povratku iz Bolnice, gdje je vozio ranjene sugrađane.

U filmu učestvuju porodica Vidović, koja se maksimalno stavila na dispoziciju, kao i nekadašnji Kelijevi saigrači, sugrađani...

Film će biti sniman na autentičnim lokacijama grada Sarajeva, gdje je pokojni Keli živio, igrao, nestao, sahranjen, ulici i nogometnom igralište koje nose njegovo ime.

TV SA će autoru na raspolaganje staviti svoje ljudske ,producijske i tehničke kapacitete -snimanje I montaža ,a za što bolju realizaciju nophodno je angažovanje:

- reditelja
- asistenta reditelja
- scenariste
- autora muzike
- naratora ili glumca

Takodjer je potrebno obezbijediti arhivski materijal iz arhive BHRT a, te u vanjskom studiju uraditi obradu starih fotografija i snimaka sa VHS kaseta.

S obzirom da navedeno podrazumjeva izdvajanje finansijskih sredstava molimo Vas da nam kao pokrovitelji izidjete u susret i pomognete da planirani projekat realiziramo na obostrano zadovoljstvo.

Minimum sredstava je cc 5.000 KM .

S poštovanjem,
Mirsad Sinanović ,izvršni direktor programa i produkcije TV SA

Mirsad Sinanović